

დამტკიცებულია
შპს ქართულ-ამერიკული უმაღლესი სკოლის
დირექტორის ბრძანებით.



მოსწავლეთა თვითმმართველობის
დებულება

მუხლი 1. ზოგადი დებულებები

- 1.1. შპს ქართულ-ამერიკული უმაღლესი სკოლის (შემდგომში „სკოლის“) მოსწავლეთა თვითმმართველობა წარმოადგენს სკოლის სტრუქტურულ ერთეულს და მისი უფლებამოსილება გრძელდება მომდევნო სასწავლო წელს ახალი არჩევნების ჩატარებამდე;
- 1.2. მოსწავლეთა თვითმმართველობა დაკომპლექტებულია 9-11 კლასის მოსწავლეებისაგან, რომლებიც აირჩევიან შესაბამისი კლასის მოსწავლეთა მიერ.
- 1.3. მოსწავლეთა თვითმმართველობა ვალდებულია, თავისი საქმიანობა წარმართოს ამ დებულების საფუძველზე და მის შესაბამისად, წვლილი შეიტანოს მოსწავლეთა განვითარებაში.

მუხლი 2. მიზნები და ამოცანები

- 2.1. მოსწავლეთა თვითმმართველობის ძირითადი ამოცანაა ხელი შეუწყოს არაფორმალური აქტივობების განხორციელებას, მოსწავლეთა ინიციატივების წახალისებას და მოსწავლეთა ინიციატივით განხორციელებულ სხვადასხვა აქტივობებში მოსწავლეთა მასშტაბურ ჩართულობას.
- 2.2. მოსწავლეთა თვითმმართველობა თავისი უფლებამოსილების ფარგლებში: ა) იცავს და წარმოადგენს მოსწავლეთა კანონიერ ინტერესებს; ბ) თანამშრომლობს სხვა საგანმანათლებლო, სასწავლო და სპორტულ/კულტურულ დაწესებულებებთან; გ) მოსწავლეთა თვითმმართველობის მიზნების მისაღწევად ახორციელებს „ზოგადი განათლების შესახებ“ საქართველოს კანონით და ამ დებულებით გათვალისწინებულ სხვა უფლებამოსილებებს.
- 2.3. მოსწავლეთა თვითმმართველობის ძირითად მიზნებს წარმოადგენს: ა) სხვადასხვა საგანმანათლებლო აქტივობების ორგანიზება; ბ) მოზარდის გონებრივი და ფიზიკური უნარ-ჩვევების განვითარება, ცხოვრების ჯანსაღი წესის დამკვიდრება; გ) კულტურულ ფასეულობათა პატივისცემა; მოსწავლის მიერ საკუთარი უფლება-მოვალეობების გაცნობიერებაში ხელშეწყობა; დ) კომუნიკაციის გაადვილება ადმინისტრაციასა და მოსწავლეებს შორის და შუამავლის ფუნქციის შესრულება; ე) კლუბური მუშაობის გააქტიურება; ვ) მოსწავლეთა ინიციატივების ადმინისტრაციამდე მიტანა; ზ) მოსწავლეთა ჩართვა სხვადასხვა ღონისძიებებსა და აქტივობებში და ა.შ.

მუხლი 3. თვითმმართველობის დაფინანსების წყაროები:

მოსწავლეთა თვითმმართველობის დაფინანსების წყაროებია:

- ა) სკოლის ბიუჯეტი;
- ბ) მოსწავლეთა მიერ მოპოვებული გრანტები, შემოწირულობები;
- გ) კანონით ნებადართული სხვა შემოსავლები.

მუხლი 4. არჩევნების ჩატარების დრო

1. მოსწავლეები ირჩევენ საკუთარ თვითმმართველობას თანასწორობის საფუძველზე, ფარული კენჭისყრით, კლასების მიხედვით თანაბარი წარმომადგენლობის პრინციპის დაცვით;

2. თვითმმართველობის არჩევნები ტარდება პირველი სემესტრის დასრულებამდე და თვითმმართველობის არჩეული შემადგენლობის უფლებამოსილება განისაზღვრება მომდევნო სასწავლო წელს მოსწავლეთა შესაბამისი თვითმმართველობის ახალი არჩევნების ჩატარებამდე.

მუხლი 5. საარჩევნო სიები და კანდიდატთა რეგისტრაცია

- 5.1. მოსწავლეთა თვითმმართველობების არჩევნებში მონაწილეობის მიღების უფლება აქვს 9-11 კლასის ყველა მოსწავლეს.
- 5.2. არჩევნების პროცესს კოორდინირებას უწევს დირექტორის მოადგილე.
- 5.3. მოსწავლეები, რომელთაც სურთ არჩეულნი იყვნენ თვითმმართველობის წევრად მიმართავენ შესაბამისი კლასის დამრიგებლებს არჩევნების ჩატარებამდე არა უგვიანეს 3 დღით ადრე, დამრიგებლის არყოფნის შემთხვევაში კი - დირექტორის მოადგილესთან.
- 5.4. რეგისტრაციის მსურველები შესაბამისი კლასების მიხედვით მიმართავენ დამრიგებლებს.

მუხლი 6. წინასაარჩევნო კამპანია და აგიტაცია

- 6.1 კანდიდატს უფლება აქვს ჩაატაროს წინასაარჩევნო კამპანია, რომელიც იწყება კანდიდატის დამრიგებლის მიერ რეგისტრაციაში გატარების მომენტიდან. წინასაარჩევნო კამპანიის წარმართვისას ყველა კანდიდატი სარგებლობს თანასწორი უფლებით.
- 6.2 საარჩევნო კანდიდატებს, ასევე მათ მხარდამჭერ პირებს უფლება აქვთ აწარმოონ წინასაარჩევნო აგიტაცია კანდიდატის მხარდასაჭერად.
- 6.3 წინასაარჩევნო კამპანია და აგიტაციაში მონაწილეობის მიღების უფლება არა აქვთ: ა) დამრიგებლებს; ბ) სკოლის ადმინისტრაციას;
- 6.4 წინასაარჩევნო კამპანია და აგიტაცია შესაძლებელია განხორციელდეს სხვადასხვა ღონისძიებების ჩატარებით (კრებები და შეხვედრები ამომრჩევლებთან, საჯარო დებატები და დისკუსიები), ბეჭდური სააგიტაციო მასალების გამოცემა-გავრცელებით, წინასაარჩევნო მოწოდებების, განცხადებების, ფურცლებისა და ფოტომასალის დამზადებისა და გავრცელების გზით, აგრეთვე კანონმდებლობით ნებადართული ნებისმიერი სხვა საშუალებით. აკრძალულია მათი გავრცელებისათვის ხელის შეშლა.
- 6.5 წინასაარჩევნო კამპანიამ და აგიტაციამ არ უნდა შეუშალოს ხელი სასწავლო პროცესს. იკრძალება გაკვეთილებზე საარჩევნო კამპანიისა და აგიტაციის ჩატარება, აგრეთვე ნებისმიერი ისეთი ქმედება, რომელიც ხელყოფს წესრიგს სკოლაში ან ზიანს აყენებს მის ქონებას.
- 6.6 სკოლას უფლება არა აქვს უარი უთხრას კანდიდატებს ან მათ მხარდამჭერებს წინასაარჩევნო კამპანიისა და აგიტაციისათვის საკლასო ოთახით, დარბაზებით და/ან სკოლის სხვა ქონებით სარგებლობაზე, თუ აღნიშნული ფართი იმ მომენტისთვის არ გამოიყენება სასწავლო დანიშნულებით. ყველა კანდიდატისათვის სკოლის ფართით სარგებლობა უნდა იყოს თანაბრად ხელმისაწვდომი.

მუხლი 7. საარჩევნო პროცედურები, არჩევნების ჩატარების წესი და კენჭისყრის შედეგების განსაზღვრა

7.1 არჩევნების მომზადების, ამომრჩეველთა ნების თავისუფალი გამოვლენის, კენჭისყრის ფარულობის უზრუნველყოფა და საკლასო ოთახებში არჩევნებისათვის საჭირო გარემოს მოწყობა ევალება დამრიგებელს.

7.2 ამომრჩეველები სასურველ კანდიდატს ხმას აძლევენ ფარული კენჭისყრით.

7.3 საბაზო/საშუალო საფეხურის თითოეული კლასის მოსწავლე ხმას აძლევს ერთ კანდიდატს მოსწავლეთა თვითმმართველობაში წევრად ასარჩევად.

7.4 გამარჯვებულად ითვლება თითოეული კლასიდან 2 მოსწავლე, რომელიც შესაბამის კლასში მეტ ხმას მოიპოვებს.

მუხლი 8. მოსწავლეთა თვითმმართველობის პრეზიდენტი არჩევის წესი

8.1. თვითმმართველობის არჩეული წევრები უფლებამოსილების მიღებიდან 7 დღის ვადაში, სურვილის შემთხვევაში, წარადგენენ საკუთარ კანდიდატურებს პრეზიდენტობისთვის.

8.2. პრეზიდენტობის კანდიდატებს ეძლევათ 10 კალენდარული დღე საარჩევნო კამპანიის გასამართად, მუხლი 6-ის მოთხოვნების დაცვით.

8.3. საარჩევნო კამპანიის დასრულების შემდეგ ტარდება პრეზიდენტის არჩევნები შემდეგი წესით:

ა) ხმის უფლება აქვთ 9-11 კლასის ყველა კლასს, სადაც თითოეული კლასი სარგებლობს ერთი ხმის უფლებით. კლასი ფარული კენჭისყრით ირჩევს ერთ კანდიდატს;

ბ) ხმის უფლება აქვთ თვითმმართველობის არჩეულ წევრებს, სადაც თითოეული წევრი სარგებლობს ერთი ხმის უფლებით;

გ) დირექციის 2 წევრს აქვს თითო-თითო (სულ 2) ხმის უფლება.

8.4. პრეზიდენტის ხმების დათვლა ხდება შემდეგი პროპორციით:

ა) 50% - კლასებიდან მიღებული ხმები (კლასის ხმები);

ბ) 50% - თვითმმართველობის წევრებიდან მიღებული ხმები (წევრების ხმები);

გ) დირექციის 2 ხმა ემატება შედეგს, როგორც დამატებითი ხმები.

შენიშვნა: ხმების თანაფარდობისას, საბოლოო შედეგს განსაზღვრავს კენჭისყრის განმეორება მხოლოდ თანაბარი რაოდენობის ხმების მქონე კანდიდატებს შორის.

8.5. პრეზიდენტად ითვლება ის კანდიდატი, რომელიც მეტ ხმას მოიპოვებს.

8.6. მეორე და მესამე ადგილზე გასული პრეზიდენტობის კანდიდატები, ასეთის არსებობის შემთხვევაში, სურვილიდან გამომდინარე, შესაძლებელია დასახელდნენ ვიცე-პრეზიდენტებად.

8.7. მოსწავლეთა თვითმმართველობის პრეზიდენტი აირჩევა მოსწავლეთა თვითმმართველობის ახალი არჩევნების ჩატარებამდე.

მუხლი 9. მოსწავლეთა თვითმმართველობის პრეზიდენტის ფუნქციები

მოსწავლეთა თვითმმართველობის პრეზიდენტი:

ა) ხელმძღვანელობს მოსწავლეთა თვითმმართველობას;

ბ) წარმოადგენს მოსწავლეთა თვითმმართველობას სკოლის ადმინისტრაციასთან და მესამე პირებთან ურთიერთობაში;

გ) კოორდინაციას უწევს მოსწავლეთა თვითმმართველობის მიერ შექმნილი კლუბების საქმიანობას;

დ) კანონმდებლობით დადგენილი წესით ახორციელებს სხვა უფლებამოსილებებს.

მუხლი 10. მოსწავლეთა თვითმმართველობის წევრისა და პრეზიდენტისათვის უფლებამოსილების შეწყვეტის წესი (კორექტირებული)

10.1 მოსწავლეთა თვითმმართველობის პრეზიდენტისათვის/წევრისათვის უფლებამოსილების ვადამდე შეწყვეტის საფუძველია:

- ა) პირადი განცხადება;
- ბ) მოსწავლის სტატუსის შეჩერება/ სკოლიდან ამორიცხვა/ სწავლის დასრულება;
- გ) სკოლის შინაგანაწესის ან წინამდებარე დებულების წესების უხეში დარღვევა;
- დ) არასაპატიო მიზეზით თვითმმართველობის სხდომებზე ზედიზედ 2-ჯერ დაუსწრებლობა;
- ე) სასამართლოს მიერ ქმედუუნაროდ, გარდაცვლილად ან უგზოუკვლოდ დაკარგულად გამოცხადება;
- ვ) სხვა ობიექტური გარემოება.

10.2 მოსწავლეთა თვითმმართველობის პრეზიდენტის უფლებამოსილების ვადამდე შეწყვეტის შემთხვევაში, მოსწავლეთა თვითმმართველობის პრეზიდენტად ინიშნება ვიცე-პრეზიდენტი (ვიცე-პრეზიდენტებიდან - ყველაზე მეტი ხმით არჩეული, თუ ისინი იყვნენ არჩეული), პრეზიდენტს დარჩენილი უფლებამოსილების ვადით.

მუხლი 11. თვითმმართველობის მუშაობის წესი

11.1 მოსწავლეთა თვითმმართველობას ხელმძღვანელობს თვითმმართველობის მიერ არჩეული პრეზიდენტი, ხოლო მისი არყოფნის შემთხვევაში ვიცე-პრეზიდენტი.

11.2 თვითმმართველობის პირველი სხდომა იმართება მოსწავლეთა თვითმმართველობის არჩევიდან 7 დღის ვადაში, ხოლო შემდგომ - მოსწავლეთა თვითმმართველობის პრეზიდენტის მოწვევით საჭიროების შემთხვევაში.

11.3 მოსწავლეთა თვითმმართველობა ადგენს სამოქმედო გეგმას, რომელიც მოცავს განსახორციელებელ აქტოვობებს, შესრულების ვადებს და პასუხისმგებელ პირებს.

მუხლი 12. თვითმმართველობის ძირითადი ფუნქციები

თვითმმართველობა დასახული მიზნების მისაღწევად ახორციელებს შემდეგ ძირითად ფუნქციებს:

- შეიმუშავებს და სკოლის ადმინისტრაციას წარუდგენს მნიშვნელოვან მოსაზრებებს სხვადასხვა საკითხთან დაკავშირებით;
- თანამშრომლობს ადმინისტრაციასთან შეთანხმებით ახორციელებს სხვადასხვა პროექტს;
- სკოლის ადმინისტრაციას აცნობს მოსწავლეთა ინიციატივებს;
- წევრთა ინიციატივით ქმნის სასკოლო კლუბებს;
- ხელს უწყობს სკოლის კლუბების აქტიურ მუშაობას;
- მონაწილეობას იღებს სკოლაში მიმდინარე ღონისძიებების, პროექტების დაგეგმვასა და განხორციელებაში;

- შუამდგომლობას აყენებს სკოლის დირექციასთან გამორჩეული მოსწავლეების წახალისების საკითხთან დაკავშირებით;
- გეგმავს გამოფენებს, ღონისძიებებს და სხვადასხვა აქტივობებს სკოლის ტერიტორიაზე სკოლის დირექციასთან შეთანხმებით;
- საქართველოს კანონმდებლობის შესაბამისად მონაწილეობს მოპოვებული გრანტის განკარგვაში;

მუხლი 13. დებულების დამტკიცება და ცვლილებების შეტანა

1. მოსწავლეთა თვითმმართველობის დებულებას შეიმუშავებს და ბრძანებით ამტკიცებს სკოლის დირექტორი.
2. მოსწავლეთა თვითმმართველობის დებულების მიღება, გაუქმება, მასში ცვლილებებისა და დამატებების შეტანა ხორციელდება ამ მუხლის პირველ პუნქტში მითითებული წესით.